

李氏五種合刊



李氏五種合刊



李

氏

五

羅

合

子

一九九零年八月江蘇

廣陵古籍刻印社據同

治刊本影印

禹貢州域以山川相經緯雖經遷變終古可識別也史志
郡縣不復能附麗於山川又代有沿革離合分割名實乖
輳益紛紜而不可理昔在孟堅有丹陽楚都之誤山經水
注沿廬江彭澤西之訛京兆南陵師古以爲甯國九江當
塗章華謂在姑孰凡茲迷謬難可縷陳此皆學貫垓塹胸
羅括地尙復爾爾況其下焉者乎夫輿地之學爲讀史第
一要義治化興替利病之由形執重輕兵家勝負之迹胥
於是觀之顧史冊雜陳迷離隱見在在鉤稽不勝眩瞀武

進李申耆大令邃於史學尤究心輿地沿革爰取正史之
有地志者凡十有四部析其郡縣之名以韻隸之條其同
異一釋以

昭代輿地所在萃及門之英閎十餘年而後成可謂任其
勞者矣每閱乙部於郡縣疑名輒用檢視應手可得覺向
者肝膽楚越忽如盧鑿之遇長桑飲以上池水盡見癥結
大令所以嘉惠來學者可謂篤矣其書舊用活字排印懷
甯鄧少白氏始爲鋟版皆流布未廣爰校讎一通重付剞

刷冀永其傳凡有志於經濟實用通達今古者不可不家
置一編也惟其書以史志爲主史記八書無地輿故所載
古國邑秦郡縣皆不錄而斷自漢始三國及梁陳北齊周
諸史無志故梓潼朱提置於蜀武昌建鄴創於吳而統稱
晉郡江陰崑山梁縣也成安固始北齊縣熊耳靈泉周縣
也而統稱隋縣數代之規二志爲總匯而晉志特爲疏略
如南廣爲蜀郡沿於宋齊志獨無之雍州之始平廣平之
臨水皆不言魏立其三國增置晉革其名若雲陽營陽吳

昌廣魏之屬益無所徵矣又其甚者晉代之制如齊國有
般陽汝山之興樂本名白馬見太康三年地記晉熙之懷
甯新治豫章之豫甯見沈約宋志隴西之蘭池見王隱晉
書地道記而志皆無徵且一書之中傳及其地志乃佚其
名如陶侃傳爲樅陽令志無樅陽縣侃爲荊州領西陽等
郡陳頽庾亮庾翼諸傳皆云西陽太守而志無有又況散
見於他書爲晉志所無者如漢沙羨音怡縣地晉置沌陽縣
渫陽縣晉太康中置越雋靈關道縣晉改護龍見水經注

陰平有平武梓潼之涪城僑置西充國益昌二縣見元和
郡縣志不勝屈指頗有出於畢秋帆尙書新補正之外者
其在他史遺佚亦往往而有如漢志廬江郡自注金蘭西
北有東陵鄉水經禹貢山水澤地東陵地在廬江金蘭縣
西北水經沔水篇又東過牛渚縣南注牛渚在姑孰烏江
兩縣界中而漢晉宋齊諸志無金蘭及牛渚姑孰縣名又
金女大文桃班陽口歷口之類皆不見於諸志元巴延潛
兵入漢屠沙洋陷新郢宋志乃無沙洋新郢也抑是編所

謂皆得其實地者亦不能無疑焉據水經注漢西陵在黃石磯今黃州府東南百里也今釋云在黃州西北漢南安當卽今四川樂山縣治今釋云在夾江縣西北二十安樂水源北逕安樂縣界又逕符縣下北入江今釋符及安樂俱云在瀘州合江縣西六舊唐書石首舊治在石首山下顯度初移治陽岐山下據酈氏石首山乃調絃口東南之東山邑志云縣舊址在調絃口往東山路是也今自晉及明統釋云今石首縣治凡若此類每欲援引補正別爲一

編附諸簡末軍興以來倥傯甚暇聊爲舉例於此用俟同志搜羅補綴以集厥成又不特大令所云歷史地名及古地名有厚望於庚續也已江陰六氏舊有歷代沿革圖蓋編是書時所作而未及合刊者兵燹後益少傳本因屬友人物色得之客又有以紀元編請者亦大令所排纂皆讀史者之紺珠也遂彙刻之云爾

同治十年辛未十月合肥李鴻章

自漢書有地理志條列郡縣因革建置歷代從之於是輿地之學遂爲專家唐宋至今纂述益廣然其疆域名號合併析易或閒廢闕晉魏後復有僞置鎮堡羈縻諸名紛紜參錯代有罷立苟非由今日以推諸古昔明其地之遠近名之同異人士且南朔之不辨奚以達其形勢利病之得失緩急哉武進李先生申耆學術閎邃慨學者於輿地之學多昧古今而諸家之書或過繁賾而失統紀嘗縱橫爲圖自沙漠迄島嶼以水道緯其經界以極度準其里差率

明簡有法復取諸史郡縣分隸韻書以今爲本推諸前代
或地名皆同或同地異名或同名異地與今昔增損有無
殊異皆列其疆域廣袤所在至其字爲韻書所無者則以
古音讀與今方言次於其部不出戶庭而時代之遷嬗裔
微之荒遼源流具在其絕舛馳何如哉夫古之儒者其於
問學多闢險阻而務以其簡易者導人記所云成物也則
以極天下之嘖者是矣道光十七年歲次彊圉作噩四月
戊申朔越七日寶山毛嶽生序

凡例

歷代地理建置沿革變亂紛總名實訛淆或同地而異名
或同名而異地南北相乖東西易向試閱史書方隅莫辨
卽繙地志心目爲惛故編錄古來史書中地志所載郡縣
之名以韻次之分別時代條其同異鉤稽今代所在之處
以著其實閱史者易於尋檢焉

二十三史有地志者漢書續漢書晉書宋書南齊書北魏
書隋書新唐書新五代史宋史遼史金史元史明史凡十

扇孰熟勾苟洛維莫鄭祚祚額額皆是若一字異音則兩
韻分收如虹分東送共分冬朱氏分支庚紙蕃番分支元
羨分支霰次分支寘慮分魚御吾分虞麻舉分虞豪單分
寒銑潘觀分寒翰鄆分寒歌燕分先霰卷分先軫鄴分歌
翰華分麻禡靡分麻紙藏相浪分陽漾令分青敬承乘分
蒸徑與分語御蓋分泰合皆是字有今韻所無者各依偏
旁音紐附入如羨入支獻入尤邵入紙若入陌皆是

地名下小注以時代前後爲次郡詳其所屬州部縣詳其

所屬州郡同地同名第以代中隔以空圈地異而同名者
次之隔以黑子

道光二年兆洛始至暨陽六生賡九問曰古今地名疆域
膠轕檢書猥繁讀史者何道以理之予示以 皇朝輿地

圖令以古地名識其上爲別以上古禹貢三代春秋戰國
爲經始年餘乃成繼檢各史地志別爲錄副而編以歸韻
編寫凡三四年乃旣繼檢 皇輿表及 一統志表詳其
沿革著之於圖皆得其實地則又七八年繼會前代郡縣